

CYNGOR SIR CEREDIGION

Adroddiad i'r:	Pwyllgor Gwasanaethau Democrataidd
Dyddiad:	7 Mawrth 2021
Teitl:	Gweledigaeth ar gyfer cynnal cyfarfodydd hybrid o fis Mai 2022.
Diben yr adroddiad:	Darparu trosolwg i aelodau o'r modd y cynhelir cyfarfodydd hybrid o fis Mai 2022 ymlaen

Cefndir

Mae Adran 47, Deddf Llywodraeth Leol ac Etholiadau (Cymru) 2021 yn nodi bod yn rhaid i'r prif gynghorau baratoi a chyhoeddi trefniadau at ddiben sicrhau y gellir cynnal cyfarfodydd awdurdod lleol o 5 Mai 2022 ymlaen drwy gyfrwng unrhyw gyfarpar neu gyfleuster arall sy'n galluogi unigolion nad ydynt yn yr un lle i fynychu'r cyfarfodydd, i siarad â'i gilydd ac i gael eu clywed gan ei gilydd, ac yn achos cyfarfodydd sydd i'w darlledu (o dan Adran 46 y rheoliadau), i siarad â'i gilydd, i gael eu clywed gan ei gilydd ac i gael eu gweld gan ei gilydd.

Gwnaeth Rheoliadau Awdurdodau Lleol (Coronafeirws) (Cyfarfodydd) (Cymru) 2020 a ddaeth i rym ar 22 Ebrill 2020 ddarpariaeth mewn perthynas â chyfarfodydd awdurdodau lleol, o ganlyniad i haint COVID-19. Roedd y rheoliadau'n ymwneud â chymryd rhan mewn cyfarfodydd a gynhaliwyd rhwng 22 Ebrill 2020 a 1 Mai 2021. O ganlyniad i'r rheoliadau hyn, cafodd pob un o gyfarfodydd Cyngor Sir Ceredigion a oedd yn agored i'r cyhoedd eu cynnal o bell. Mae'r trefniadau hyn wedi parhau a bellach maent yn ffurfio rhan o Ddeddf Llywodraeth Leol ac Etholiadau (Cymru) 2021 a byddant yn sail i'r trefniadau hybrid ar ôl 5 Mai 2022 lle bo Aelodau, Swyddogion a'r cyhoedd yn gallu mynychu cyfarfodydd o bell neu ddod eu hunain i leoliad y cyfarfod.

Mynychu lleoliad y cyfarfod neu fynychu o bell

Bydd Aelodau, Swyddogion ac aelodau'r cyhoedd yn gallu dod eu hunain i Swyddfa'r Cyngor ym Mhenmorfa, Aberaeron ar gyfer cyfarfodydd y Cyngor sy'n agored i'r cyhoedd neu gallant fynychu'r cyfarfod o bell (lle bynnag y bo hynny'n bosibl). Dylid nodi y gall fod cyfyngiad ar y niferoedd a gaiff fod yn bresennol yn yr adeilad oherwydd faint o le sydd ar gael ac unrhyw reoliadau neu ganllawiau a allai fodoli ar y pryd, er enghraifft y rheoliadau/canllawiau i gadw pellter cymdeithasol o 1 neu 2 fetr sydd wedi bodoli yn y gorffennol.

Mae'r gwaith o osod cyfarpar i hwyluso cyfarfodydd hybrid yn mynd rhagddo ar hyn o bryd a bydd canllawiau manwl yn cael eu darparu pan fydd y gwaith hwnnw wedi ei gwblhau ac wedi i Swyddogion y Gwasanaethau Democrataidd gael hyfforddiant sut i'w ddefnyddio. Ni dderbyniwyd Canllawiau Statudol Terfynol oddi wrth Lywodraeth Cymru ac ar hyn o bryd ni chafwyd amcan ddyddiad ar gyfer derbyn y canllawiau hyn. Yn y cyfamser, *rhagwelir* y bydd y canlynol yn berthnasol.

Darparu gwybodaeth cyn cyfarfodydd

Yn unol â'r arfer ar hyn o bryd, bydd gofyn i Aelodau ddarparu'r wybodaeth ganlynol cyn y cyfarfod:

- Ymddiheuriadau
- Nodi a ydynt am ddod eu hunain i leoliad y cyfarfod neu a fyddant yn mynychu'r cyfarfod o bell
- Darparu manylion unrhyw ddatganiadau buddiant
- Darparu manylion unrhyw faterion personol y maent am eu cyflwyno
- Dylai Aelodau nad ydynt yn aelodau o'r pwyllgor hysbysu'r Cadeirydd a hwylusydd y cyfarfod cyn y cyfarfod os ydynt am siarad ar eitem benodol sydd ar yr agenda.

Gall aelodau'r cyhoedd annerch y Pwyllgorau Trosolwg a Chraffu a'r Pwyllgor Rheoli Datblygu, fel y nodir yn y protocolau perthnasol. Mae'r protocolau yn mynnu bod aelodau'r cyhoedd yn rhoi gwybod i'r Gwasanaethau Democrataidd ddau ddiwrnod cyn y cyfarfod os ydynt am wneud cais i annerch y Pwyllgor. O fis Mai 2022 ymlaen, bydd unrhyw aelod o'r cyhoedd a fydd yn annerch pwyllgor o'r fath yn gallu gwneud hynny o bell neu drwy fod yn bresennol yn Siambr y Cyngor.

Cyn y cyfarfod, bydd hwylusydd y cyfarfod yn rhoi crynodeb i'r Cadeirydd, gan gadarnhau'r manylion y gofynnwyd amdanynt cyn y cyfarfod, gan gynnwys ymddiheuriadau, materion personol a datganiadau buddiant ac ati yn y drefn y'u derbyniwyd.

Mecanwaith ar gyfer cynnal y cyfarfod

Rheolir y cyfarfod drwy gyfrwng System Rheoli Gyfrifiadurol a fydd yn gofalu am reoli'r meicroffon, pleidleisio, amseru anerchiadau a thracio'r camera yn awtomatig ar gyfer pob system feicroffon analog (yn y lleoliad) a digidol (o bell). Bydd aelodau a fydd yn mynychu lleoliad y cyfarfod yn cael mynediad at yr opsiynau hyn drwy gyfrwng uned y meicroffon, tra bo Aelodau sy'n mynychu o bell yn cael mynediad atynt yn uniongyrchol drwy sgrin y cyfrifiadur neu drwy ddefnyddio llygoden neu sgrin gyffwrdd. Gellir gweithredu system y meicroffon mewn un o ddau dull: y Dull Canolog a'r Dull Unigol. Yn y Dull Canolog, rheolir y meicroffonau gan y Cadeirydd ac mae'r Aelodau'n gwneud cais i siarad, ar y llaw arall pan ddefnyddir y Dull Unigol, yr Aelodau sy'n rhoi'r meicroffonau ar waith ac yn eu diffodd yn uniongyrchol. Mae'r Dull Unigol yn fwyaf addas ar gyfer cyfarfodydd bach. Rhoddir system dracio'r camera ar waith yn awtomatig er mwyn panio i feicroffonau byw.

Cyn cyfarfod, bydd angen bwydo gwybodaeth i'r system am y sawl fydd yn mynychu lleoliad y cyfarfod, er mwyn i'r wybodaeth gael ei harddangos ar y sgrin yn ystod y cyfarfod, pan fo Aelodau yn gwneud cais i siarad a thra bo meicroffonau'n cael eu galluogi. Os bydd yr Aelodau'n penderfynu rhoi'r opsiwn pleidleisio ar waith yn hytrach na galw rhestr enwau allan ar gyfer pob eitem, mae'n hanfodol bod yr wybodaeth wedi ei gosod ymlaen llaw, a bod Aelodau'n hysbysu Swyddogion y Gwasanaethau Democrataidd cyn y cyfarfod, gan roi gwybod a fyddant yn mynychu o bell neu yn dod eu hunain i leoliad y cyfarfod.

Bydd y cyfleuster cyfieithu yn rhyngwynebu drwy glustffonau i'r sawl fydd yn dod i leoliad y cyfarfod a thrwy opsiwn dewis iaith i'r rhai fydd yn mynychu o bell.

Bydd angen ystyried sut y defnyddir y system newydd yn y weinyddiaeth newydd wedi i ni dderbyn y Canllaw Statudol terfynol a phan fyddwn wedi dod i ddeall holl bosibiliadau'r system.

Argymhellion: Argymhellir bod y Pwyllgor yn nodi'r adroddiad.

Atodiadau: Dim

Dogfennau Cefndir: Deddf Llywodraeth Leol ac Etholiadau (Cymru) 2021:
<https://busnes.senedd.cymru/mglIssueHistoryHome.aspx?Ild=26688>

Enw: Nia Jones
Teitl y Swydd: Rheolwr Corfforaethol – Gwasanaethau Democrataidd
Dyddiad: 22.02.2022